



Iuda veut demeurer serf pour Benjamin : Et Ioseph ayant pitié de ses freres, se donne à connoistre à eux.

IVDA voyant que Ioseph vouloit retenir pour serf le petit Benjamin, pour reparation de la coupe qu'on auoit trouuée en son sac, luy remontra humblement que leur pere Iacob ja fort ancien auoit deux enfans, dont l'un nommé Ioseph estoit mort, & que Benjamin estoit resté seul, & tant chery d'iceluy, que si nous retournons sans luy (disoit-il) ie le verray mourir de tristesse. Parquoy, Seigneur, permets que ie demeure serf au lieu de l'enfant, & qu'il s'en retourne avec mes freres. Lors Ioseph meu de pitié, ne pouuant plus se contenir, fit sortir ses gens pour se manifester à eux, & leur dit doucement : le suis Ioseph vostre frere, que vous auez vendu, mais n'en soyez contristez ; car Dieu l'a ainsi permis pour vostre bien & conseruation, d'autant que parmy la terre sont ja passez deux ans de famine, qui continuera encore cinq années sans labour ne moisson, c'est pourquoy Dieu m'a enuoyé pour vous conseruer, & ce pais-cy. Hastez-vous donc d'aller à mon pere, pour luy dire ce qu'auetz veu, & qu'il descende en Egypte avec toute sa famille, bœufs & brebis, & que ie nourriray le tout en la terre de Gessen. Or le bruit de ce vint à Pharaon, qui en faueur de Ioseph commanda que ses freres fussent receus & festoyez ; & pour haster la venuë de Iacob, commanda leur estre baillez viures & chariots, & à chacun d'iceux deux habits, & à Benjamin trois cens pieces d'argent, & cinq vestemens tres-bons.

Genese 44. Et 45. Chap.